

石
匱
書
後
集

召遺書卷第十

毛文龍列傳

毛文龍浙之錢唐人也。無賴，有口才，習為姑布術。立莊嶽，相人取其直。杭人呼之曰默。自杭至京鹿，無所遇。走邊塞，潦倒行伍者二十餘年。天啟改元，與丹陽諸葛雲程遇，暢談邊事，遂知其能，剡薦於遼東巡撫王化貞。委任，稱使，授標下游擊。五月十一日，差往河東探戢難民，至三

岔河駕船至猪島鹿島禽島安撫數處有遼左
廩生王一寧者來會自言遼城陷後往朝鮮借
兵報仇朝鮮禮遇甚厚文龍即與定盟走通朝
鮮進次彌串堡議襲鎮江遂約鎮江中軍陳良
策內應鷄鳴薄城下破城安撫不拾民間一芥
民大感悅數百里內望風來歸者不絕後見兵
力單弱朝鮮請兵不應人皆解體朝議授王紹
勳鎮江副總兵毛文龍叅將住鎮江聯合南衛

東江觀望進取女直乘其無備以續騎四萬襲之鎮江復陷文龍奔朝鮮壬戌三月兵部議毛文龍寄身海島如有應援可出其不意潛師搗虛有此可用之衆不圖接濟得毋灰忠臣義士之心乎當速發衣糧使其兵食不乏宜授文龍以總兵職銜與王紹勳等同心協力共圖征剿制曰可八月文龍任事遣部將陳忠等斬獲櫻桃渦湯站等處賊級有差隨上制敵滅敵一疏

欲羈縻西鹵聯絡朝鮮于三方布置以廣寧之
守為正登津之戰為奇且從各島入金復海蓋
彼此擊應使有率然之勢 上允行之癸亥十
月文龍報涼馬大捷報牛毛再捷甲子四月又
報賊將金重德等又報敗女直兵於高嶺沙松
牌禽頭目太柰等獻俘奏捷加左都督仍賞大
紅蟒衣一襲戶科給事中楊文岳奏海外俘獻
中途更換巡撫李嵩叅文龍駐瀕瀕島去女直

二十餘里女直犯寧遠三月文龍茫然不知何
謂牽制上皆不問以文龍提兵海外聯絡往
來作後勁於開門也 熹廟崩 思宗踐祚諸
文臣視東江之師為贅旒餉道屢絕文龍亦退
保皮島日以參貂交結當道海島無事惟招致
商賈以接濟糧儲請械請餉呼應不靈督師袁
崇煥莊事還當女直主病死崇煥差番僧喇嘛
錫南本座往吊謀以歲幣議和女直許之乃曰

無以為信其函毛文龍首末與幕下士謀乃上
疏巡視海外諸島查核兵餉初疏謂臣出海外
不敢輕齎勅印乞供奉寧遠公署後疏謂臣幕
士周錫圭謂臣海外行事豈可不奉勅印并乞
齎奉尚方以行上許之乃至雙島文龍往寧
遠晉謁崇煥遲之兩日見江上戰船將士皆傲
視不顧諭以督師親至地方余輩可不晉謁對
曰未奉將令不敢晉謁崇煥愕塞不發一言但

日與幕客數人沿江閒步拾沙際文石攫奪為
戲或呼酒席地小飲成狂兵船偵探見者皆曰
督臺輕狂若是皆不以為意踰兩日報毛帥歸
島次日進見倭慢無禮崇煥亦第忍之乃索其
兵將名冊以給犒賞文龍不甯進冊漫應曰本
鎮所帶親丁現在隻島者三千五百餘人耳明
日領犒崇煥乃約次日犒軍登岸較射乃傳令
中軍帶親丁四面擺圍崇煥坐帳房犒賞軍士

文龍來謝坐語良久崇煥曰明日不能踵別國
家海外重寄合受煥一拜、已相約減從上山
親丁仍於山上擺團文龍從官百二十人俱統
園內兵丁十名截營外崇煥乃命送官過見慰
勞之曰各將官海外勞苦糧多不敷使汝等空
乏情寔可憫汝等亦受我一拜、已衆皆感泣
遂問將官姓名有言毛可公毛可侯毛可將毛
可相百二十人俱姓毛崇煥曰汝等豈可都姓

毛文龍應曰皆是小孫崇煥作色向文龍曰此
便欺我此輩皆異姓之人今皆姓毛吾聞天子
方可賜姓汝今擅改人姓欺君罔上罪莫大焉
顧各官曰汝等還該復還本姓為朝廷出力自
立功名何得為毛氏子孫為此欺罔之事因大
聲向文龍曰我到此數日披肝瀝胆望衆聽我
訓誡豈意汝狼子野心總是一片虛詞目中已
無天子國法豈容寬假語畢西向叩頭請皇命

褫文龍冠帶數之曰女有應斬十二大罪兵馬
錢糧不經查核夜即自據橫行一方專制孰其
當斬一說謊欺君殺降誅順全無征戰却占首
功欺誑孰甚當斬二副懷撒潑無人臣禮牧馬
登萊問鼎白下大臣不道當斬三每歲侵餉銀
數十萬每月給米三斗五升尅減軍糧當斬四
私開馬市潛通島裔當斬五命姓賜氏不出朝
廷走使輿擡濫給劄付犯上無等當斬六劫掠

商人奪船殺命積歲所為劫賊無算身為盜賊
當斬七部將之女收為姬妾民間之嬖沒入為
奴好色誨淫當斬八逃難遼民不容渡海日給
碗飯令往掘參畏不肯往餓死島中草菅民命
當斬九拜魏忠賢為父迎冕旒像於島中至今
陳汝明一夥盤踞京師交結近侍當斬十女直
攻破鐵山慘殺遼人無數逃竄皮島掩敗為功
當斬十一開鎮八年不復寸土觀望養寇當斬

十二又曰我今日案罪殺文龍若不能恢復遼東以還朝廷願試尚方以償爾命又諭各官曰毛文龍十二罪汝等說當與不當若殺之不當汝等上來先殺了我延頸就戮衆官皆相視失色叩頭乞哀文龍神色頓喪不復能言但云文龍自知死罪只求恩赦崇煥曰若不正法這東江一塊土終非皇上所有西向叩頭請尚方劍斬文龍首於帳前隨喚東江各官進見諭曰

我今日只斬文龍一人以安海外兵民這是殺人安人爾等各官照舊供職各復原姓為國家報效罪不相及也慎勿疑惑又將東江兵四萬八千分為四協仍頒賞有差次日復登山試演委中軍收回所賜文龍尚方劍符驗乃抵寧遠待罪疏入舉朝驚駭後女直大舉入犯直薄都城崇煥尾其後入援遇敵不戰山海總兵滿桂戰敗遂入城請陞見言崇煥許 皇上五年減

寇難踐其語故勾引入犯遂以歲幣啖敵欲為
城下之盟故先殺文龍以為信物 上大怒下
獄處死故時人謂其殺毛文龍比之秦檜之殺
岳飛

召賈書曰有客從皮島來余問毛將軍在島何
事客曰日急京中邸報耳余曰邸報奚急也客
曰閱邸報方知邊事是一語可以定東江之案
矣文龍僻處海島去女直遠甚擒襲戰功以固

當寧恐羽書不合故急邸報耳掩飾去吾父當
自敗袁崇煥之殺文龍特為文龍覆其拙耳夜
臺有知方德袁無已乃謂檜之殺飛是耶否耶

石晉書卷第十一

袁崇煥列傳

袁崇煥廣東騰縣籍東莞人萬曆己未進士為
邵武縣令天啟壬戌陞兵部職方司主事時廣
寧失陷王化貞與熊廷弼逃歸畫山海關為守
京師各官言及遼事皆縮朒不敢任崇煥獨攘
臂請行與閻鳴泰同出監軍山海巡撫劉綎議
于山海關外掘壕斬築倭城關左山石海山麓

砲礮不受鋤車崇煥初言守關當於關外守之
築城與掘壕俱不便請罷閣部孫承宗自請至
關相度形勢是崇煥言掘壕議遂寢朝議遂以
孫承宗為經略於關外恢復八城崇煥移鎮寧
遠內寅北騎四十萬偪寧遠城：中戍守數千
人兵勢單弱城外有紅炮數門無敢發者崇煥
事急勒唐通判親自發炮凡放紅大炮者必於
數百步外掘一土塹火着線即翻身下塹可以

免死唐通判不曉其法竟被震死炮過處打死
北騎無算并及黃龍幕傷一裨王北騎謂出兵
不利以皮草裹屍號笑奔去捷聞上大喜拜
崇煥為都察院右僉都御史巡撫遼東尋晉兵
部右侍郎遼東人謠曰苦了唐通判好了袁崇
煥丁卯養病歸崇禎踐祚起兵部尚書加太子
太保令地方官敦趨就道遂於元年七月十四
日至邸上御平臺特宣崇煥并輔臣尚書九

卿等召對 上語崇煥曰女直距梁十載封疆
淪陷遼民塗炭卿萬里赴召有何方畧具實奏
聞崇煥對曰臣受 皇上特達之知注臣於萬
里之外倘 皇上假臣便宜五年而東患可平
全遼可復以報 皇上、曰五年滅寇便是方
略朕不吝封侯之賞卿其努力以解天下倒懸
輔臣韓爌劉鴻訓李標錢龍錫等奏曰崇煥肝
胆識力種、不凡真奇男子也崇煥奏曰臣在

外調度所有奏聞一憑閣臣處分閣臣不可不
着力主持上顧諭閣臣閣臣奏曰敢不承命
崇煥又奏曰邊事四十年蓄聚此局原不易結
但皇上宵旰於上政臣子枕戈待旦之秋臣
盡心竭力約略五年但五年之中須事、覈實
第一錢糧第二器械戶工二部俱要悉心措置
以應臣手上顧諭兩部尚書王家楨張維樞
奏曰敢不承命崇煥又奏曰臣奉命在外止以

滅寇為事五年之中事變不一還要更兵二部
俱應臣手所當用之人選與臣用所不當用之
人即與罷斥上顧諭兩部尚書王永光王在
晉奏曰敢不承命崇煥又奏曰聖明在上各部
公忠亮無不應臣手但臣之力制東事而有餘
調衆口而不足一出君門便成萬里忌功始能
豈遂無人即凜然於皇上之汰度不致以權
掣臣之肘亦能以意亂臣之心上曰朕自主

持不必以浮言介意崇煥又奏曰有皇上主
持臣不孤立諸臣米能實心任事悉如臣請臣
若不能成功以復故土何顏復見皇上但臣
學力踈淺望皇上指示教訓上起立曰卿
條對并：不必謙讓閣臣奏曰此臣作法自別
向為縣令不取一錢天生此臣以為社稷用佐
皇上甲興乞皇上假以便宜撤回王之臣滿
桂尚方劍單賜崇煥以一事權上然其言傳

諭兵部上復呼崇煥近前溫語諭之曰願卿

早平外寇以舒四方蒼生之困崇煥舉手加額

曰皇上念及四海蒼生此一語皇天后土實

式臨之臣所學何事所做何官而不仰體皇上

上蚤結此局臣之作用倣漢之趙充國則無異

勿煩皇上焦勞惟皇上寬心上曰卿所

奏更見忠愛卿宜嚴明節令撫卹士卒與文武

同心何難滅寇崇煥奏曰謹遵明旨銘之肺腑

前去告諭官軍以宣 皇上威德滅寇必矣遂
叩頭出是年八月至鎮上疏請巡視九邊明年
五月晦巡至鎮江雙島與毛文龍盤桓數日於
六月六日設帳房於山上犒軍較射遂縛文龍
數以十二罪出尚方劒斬之疏聞京師震駭崇
煥隨奏臣守寧遠寇被臣創決不敢侵犯臣界
只有遵化一路守成單弱宜於彼處設一團練
總兵遂以王威為請兵部以王威新奉部勅不

肯即予留難移時北騎果於遵化入口崇煥與
祖大壽率蒙古壯丁萬餘騎進援薊鎮北騎至
薊鎮與崇煥兵遇不戰離城數里札營次蚤直
趨京師崇煥尾其後亦至京師城下即上疏請
入城養病俟病稍痊出戰上不許召崇煥陞
見勞以裘帽即命歸營是日北騎繞城北山海
總兵滿桂方到兵未成列北騎襲之大敗全軍
覆沒滿桂僅殺入陣救出滿桂滿桂創重伏馬

上馳出陣至城下請入陞見遂言崇煥於女直
主殂差喇嘛僧往彼議和殺毛文龍以為信物
今勾引入犯以城下之盟了五年滅寇之局

上猶未信有二內官被擄囚營中逃歸言親見
崇煥差官往來語言甚密者又言城上瞭望有
見數兵與我兵嬉笑偶語往來游戲者又言滿
挂戰不利差人往崇煥營連其放炮及放炮皆
無錢糧省上大怒即遣中使二人召崇煥面

議軍事崇煥欲無往而難於辭乃以軍中見疑請以二中使為質上即以二中使留質軍中崇煥陛見上命滿桂與之面質滿桂見崇煥御前賜坐拉之下跪盡發其通敵奸狀并言其接濟寇糧鑿有據崇煥見滿桂色變遂不能辨免冠請死上命錦衣衛堂上官拿送鎮撫司即命滿桂往統其軍祖大壽聞崇煥下獄即引大隊人馬奪關而出徑奔寧遠北騎以崇煥

死飽掠去滿挂以創重斃明年四月鎮撫司讞
其獄具上曰袁崇煥斬帥以踐約市米以資盜
糧今勾引入犯對壘不戰又堅請入城養病意
欲何為本當族誅姑開一面之網袁崇煥即着
會官凌遲處死妻子流三千里口外為民遂於
鎮撫司綁發西市寸、轡割之割肉一塊京師
百姓送僧子手爭取生噉之僧子亂撲百姓以
錢爭買其肉頃刻立盡開膛出其腸胃百姓群

起搶之得其一節省和燒酒生噓血流齒頰間
猶唾地罵不已拾得其骨者以刀斧碎磔之骨
肉俱盡止剩一首傳視九邊

石匱書曰袁崇煥短小精悍形如小猱而性極
躁暴攘臂談天下事多大言不慚而終日夢
墮幕士雲霧中而不知其着魅着魘也五年滅
寇不能滅而自滅之矣嗚呼秦檜力主和議
緩宋亡且二百餘載崇煥以蹉跎庸才焉可上

比秦檜亦猶之毛文龍以么魔小卒焉可上比
鄂王論者乃取以比擬不特開罪鄂王亦且唐
突秦檜笑

崇煥被反間而死至今寃已大白此傳所

記皆據輝史傳南非信史也丁秉衡讀此

石田

身

石匱書卷第十二

周延儒楊嗣昌溫體仁列傳闕

石匱書卷第十三

蔣德璟黃景昉吳姓列傳

蔣德璟景弼八公福建晉江人天啓壬戌進士改庶吉士授編修歷陞詹事府正詹事修大明會典充副總裁教習庶吉士崇禎庚辰陞禮部右侍郎知起居註四月十三日上傳召對平臺德璟在列上以北騎在義州已經半月垂問籌畫復將御筆減寇雪恥四字傳示群臣德璟

出班奏曰我皇上滅寇雪恥四字就是中興大有為根本臣每見皇上傳諭戶兵各部及申飭各邊督撫等官睿慮精詳無不周密只是各邊未有力行就如練兵一事中飭再三其實兵何曾練只是將花名文冊點操一番花刀花鎗全無定著臣每讀會典見太祖高皇帝教練軍士律以弓弩刀鎗分別試驗立行賞罰此是練軍之法凡衛所總小旗補役以併鎗勝負為陞

降凡襲替官舍比試必須騎射開習方准頂襲
此是練將之法當時百戰百勝只是兵練得精
高皇帝身在兵間十有七年及登大寶三十餘
年這四十七年間所為聖子神孫帝王萬世之
計那一件不是周到難道二三百年来並無一
兵到 皇上纔要設兵難道不無一餉到 皇上纔
要加餉 上起聽曰聞所未聞璟對軍即是兵總
計內外衛所三百餘萬軍兵儘足用且養軍之

屯田益糧甚多二三十年並不曾加派餉儘足用
如今只將祖制振舉件件定做自可減敵上曰
再奏從容奏來璟奏今全盛天下何憂小醜
肅皇帝時北有俺答南有倭奴蹂躪浙直福廣
諸省亦極猖獗只用俞大猷戚繼光諸好將官
無不掃靖以皇上神武同符世宗滅此亦何
難臣嘗慕有俞大猷劍經戚繼光練兵書的是
今日練兵要着上曰練兵書朕亦看過璟對是

書雖經御覽只各將官不曾實行中間練刀練
鎗練火器諸技各有教師訓課如父兄子弟一
般所以可用上曰練兵書還說練胆環對練胆
是第一義兵若無胆如何站住然必技藝精熟
繼光云藝高則胆壯也 上曰今敵在義州作
何籌畫環對義州距錦州九十里錦州距寧遠
六十里寧遠入山海關至京近千里北騎在瀋
陽相距甚遠決不從關內外來只恐占住義州

徑至大寧僅二百六十里便可犯薊犯宣却是
可慮 上曰里數亦不須算只說目前要着璟對
總不外練兵二字練兵雖平日工夫對臨時亦
只此一件即今錦州八城要戰要守總須兵站
得住與敵上陣總要兵精兵如不精別無奇策
傳聞兵十萬虛冒每有一半蠹餉不貲此是最
病痛處 皇上每患餉銀之少在臣却患餉銀
之多祖制各邊養軍只屯鹽民運三項原無京

運銀兩自正統間始有京運數萬兩至萬曆末
止三百餘萬分運各邊自戊午後漸々加派
至九百餘萬名曰遼餉又有勦餉并舊餉約計
二千餘萬以萬曆末加至五六倍民窮財盡而
兵反少於往時且兵食米麵馬食草豆今本色
津運甚多却多置之汜爛而動輒索銀解去千
萬正不知作何銷耗到得臨敵又只是借名鼓
譟挾貲竄逃迢迢劫掠無所不至就如賈庄之

戰總督戰死兩總兵徑行逃歸依舊充為事官
立功戴罪如此行兵誰肯用命 上曰兩總兵何
名璟對臣偶記不真 上曰汝記得的璟對似是
楊國柱虎大威兩個奴才今天下之大豪傑之
多何患無將國初中山王徐達開平王常遇春
諸名將都是 高皇帝駕馭得好禁中頗收何
患無人且古來大將如宋岳少保韓蘄王皆出
自行伍其所以破敵之法皆用步兵蓋金以擴

騎難當惟步兵用藤牌及火器可以制之上曰
馬亦少不得璟對馬政自當修舉國初設兩京
太僕寺及各邊行太僕寺苑馬寺好馬良多今
以萬乘之尊日中市馬安望富強至衛所官軍尤
為急着文皇帝設軍衛七十二計軍可四十
萬畿內八府軍二十八萬又有中都太寧山東
河南班軍十六萬春秋入京操演得居重御輕
之勢今班軍只是做工虛冒包攬不可勝詰且

自來累朝征討皆用衛所官軍。有父母妻子
與烏合不同。自嘉靖末募兵至今。遂置軍不用。
以致加派日增。兵民俱困。臣家福建海邊。幼時
見海賊登岸。無不驚怕。後各家練幾個勇軍。橫
槩海上。賊便不敢登岸。以此知軍之可用。上曰
這奏亦有可採。璟又奏。如今京營十餘萬。亦是
衛所軍卒。既可行于京師。則各省自然行得。總
只在賞罰嚴明。皇上昨表章關外守將。全國鳳

大家無不感奮唐太宗有雪恥酬百王除兇報
千古之句彼英主尚能擒誦利諸酋况皇上神
武百倍太宗何患小醜惟願憲章二祖修復初
制自然指日中興奏畢俯伏起歸西班是年聖
駕幸學郊天耕藉享太廟皆璟引導祈雪山川
壇委璟行禮記註詳悉備載懋書壬午五月枚
卜閣臣上以吏部廷推多拘資格憑藉輿援不
列外官多徇情面是以衣裘獨新以召對稱旨

持簡詞臣蔣德璟黃景昉外任吳姓同陞禮部
尚書東閣大學士德璟輩受事一年半載賜坐
三次賜宴二次賜騎馬游西苑一次召對六十
餘次每呼先生而不名其間申救李日宣張瑄
章正宸房可壯宋玖張三謨黃道周劉宗周金
光宸等拯救正類力可回天璟當召對每以加
派太多民不堪命及各邊虛冒情弊激切數陳
隨將九邊十六鎮山川險要屯鹽民運新舊兵

餉塞外部落募為御覽備邊冊十二套次第進呈復請停鈔法罷采北直山東河南浙江桑穰二百萬勛蠲免召買米豆一百萬戶乞裁減總餉七百三十萬兩諸多艱直遂於甲申正月間擬票科臣光時亨疏有向前聚歛小人倡為練餉及搜括諸議以致民窮禍結誤國良深等語上震怒面加譴責璟叩頭待罪同官陳演等申救乃

蒙恩宥隨即出直具疏以足疾求斥後連
控二疏上准回籍調理仍賜銀幣乘傳
以行離京數日舟在津滄都城忽陷遂
易小舟潛居村落與地方官急議恢復
及聞吳三桂殺賊遠遁遂循歸里弘光
監國遣行人張廷榜趨召以疾力辭後
上恢復機宜八款以效忠惻家居考終
生平博覽群書所學甚富著作甚多尤

精於詩學為作原詩一篇考核精詳具見胸中博洽使職居侍從如虞世南為唐之行秘書則晉江二相亦為吾明之行秘書矣

黃景昉字太穉號東厓福建晉江人天啓乙丑進士選庶吉士楚御史吳裕中建_其杖景昉躬撫之榻前比沒楚人無敢臨其喪者景昉獨解橐賻之人服其膽時瑞猷方張即請假歸以避其鋒戊辰思宗登極始入都授編修歷官展書

知起居注編纂誥勅諸所撰誥勅尤為時所傳
誦庚午典試三楚辛未丁租憂甲戌還朝陞左
中允充日講官丙子轉左諭德復典畿闈其在
經筵奏對剴直語侵政府首揆畜怒戊寅轉石
庶子召對平臺因奏考選未盡公道如推官成
勇朱天麟廉能最著不獲預清華選遂俱得旨
改館員科道者十數人大司寇鄭公三俊以註
誤繫獄景昉面救又復疏陳極言其清正得釋

繫首揆益加嫉忌景昉即以封差行抵饒州蓋
却淮府餽贈信宿即行省貧藩無筭庚辰差竣
報命轉少詹事全詹翰官入對時太監高起潛
擁重兵關外驟撤回未至中外慮有化變無敢
言及者又黃道周謫江右幕員撫疏薦及之至
蒙逮繫舉朝震恐景昉面對時即昌言御前以
絲徹回監視并遼撫即有警報疑此中或有隱
情復以用舍喜怒之間須再加斟酌為言竇為

黃道周稍寓規諷兩班聽者皆為咋舌辛巳以
詹事署掌府篆復以原官改掌翰林院印黃道
周獄久未解為陰請之政府司寇甚力始得從
編戊去壬午會推閣員召對中極殿稱旨遂欽
點陞禮部尚書兼東閣大學士入直辦事在閣
受事半載賜坐三次賜宴二次賜騎馬遊西苑
一次召對六十餘次每呼先生而不名皆異數
也癸未見時事日非遂懷去志緣先帝性明

察而於大機宜顧屢多違拂喜怒旋更所施行
往々唯意以此終不能有所濟唯有意求引退
而已具疏求去得旨馳驛歸北夔之後家居二十
年以壬寅歲視履考終所著湘隱堂集二十
四卷甌安館詩三十卷續詠十二卷左史唯疑
十六卷國史唯疑十二卷行世

吳姓號庶友揚州興化人萬曆癸丑進士知邵
武縣事調繁晉江壬戌考選授山西道御史彈

勅不避權貴 思宗二年欽走逆案召廷臣于
文華殿先是御史毛九華劾禮部尚書溫體仁
有媚璫詩刊本 上問體仁體仁謂出自錢謙
益誣論又出御史任贊化叅體仁疏其語褻
上不懌謫贊化于外吳姓出班言 上因溫體
仁前削章允儒降房可壯瞿式耜今又斥任贊
化班行無色乞召還言官不聽體仁大拜後心
惡姓亦緘然以避其鋒體仁去位姓始入職

浮沉十四五年至壬午始與蔣德璟黃景昉三人同大拜陞禮部尚書東閣大學士入直辦事未轉侍郎遽加尚書出自特眷時因召對三人力言黃道周清修博學并永成窮苦狀上意動遂有賜環命初會推時忽有昔人封還詔書遺意癸未叙輔佐勲晉太子少保戶部尚書兼文淵閣太學士給三代誥命蔭一子入監讀書後見時事日非在揆靡止十有五月遂執意乞

雖終未得請未幾即僞國變三人皆不與難時
人服其見幾

石匱書曰 思宗故卜宰相廷臣會推皆以情
面資格血氣玄黃上乃自出盧公夢求良弼特
相三君子于崇禎末樸蓋三君子者處則為慧
業文人出則為救時宰相乃運遭陽九數月揆
靡不究其用殊為可惜但三君子皆學富五車
文起八代談言微中可以解紛用以拯救正人

挽回冤獄則三君子之相業不在揚士奇李東陽之下矣

石匱書卷第十四

流寇死事諸臣列傳

傳宗龍貴州人萬曆庚戌進士縣巴縣令拜侍
御史巡浙直鹽政以才能著崇禎初陞都御史
巡撫順天次年總督劉遼以誑誤削籍十年奢
寅亂四川王三善陷大方死諸臣無敢任其事
者推轂宗龍往撫西蜀所陳兵事數十餘疏悉
中機宜朝野倚重未幾陞兵部尚書一年解職

下獄論死十四年流寇破河南歸德諸郡縣京
師震動詔赦宗龍出之獄以兵部右侍郎兼副
都御史督陝西兵討賊宗龍拜命師未入境賊
先軍於東以待陝西總兵賀人龍江南總兵虎
大威與戰殺傷相當賊乃秣馬蓐食更番迭出
以罷我師日中盛暑士卒飢甚休卧樹下為賊
所乘師大敗退次汝州壁壘未脩賊又乘之又
大敗死者相藉二帥不能支何宗龍曰賊銳不

可當姑避之以圖再舉宗龍曰吾受命討賊義
不旋踵二將軍能為我決戰則幸甚否則有捐
軀報國已矣又將為往二帥曰兵家有趨吉避
凶法明公欲委肉虎口無為也二帥引騎兵奔
陳州宗龍歛步兵穿塹築壕以拒賊亦築壕
二重以困之宗龍兵食盡乃殺馬騾以饗士馬
騾又盡殺賊取其屍分噉之營中火器弓矢俱
盡宗龍簡疲卒尚有六千夜漏二下潛勒軍突

賊營潰圍出諸軍星散宗龍徒步率散卒且戰
且走將至項城賊追之被執至城下賊呼於門
曰我秦督官軍也速開門納秦督宗龍大呼曰
我秦督也不幸墮賊手左右皆賊耳毋為所紿
賊唾宗龍宗龍罵曰我大臣也殺則殺耳豈能
為賊詐城以緩死賊抽刀擊宗龍中腦而仆稍
甦猶厲聲罵賊割其耳鼻死城下事聞後宗
龍兵部尚書贈太子太保一時死難諸臣則有

南贛兵備副使王孫蘭四川巡撫龍文光廬州
知府鄭履祥保康知縣石惟壇

孫傳庭太原人萬曆己未進士以商丘令考覈
授吏部驗封司主事崇禎丙子陝西巡撫甘學
濶削籍聽勘以孫傳庭代之丁丑陞兵部右侍
郎總督河南戊寅十一月北騎進口京師戒嚴
召洪承疇於三邊召孫傳庭於陝西合兵五萬
出潼關入援改承疇為副總督傳庭為保定

總督傳庭以失聰辭 上不許尋逮傳庭下獄
十六年流賊圍開封急汪喬年師敗死之京師
大震孫傳庭於獄中上書請討賊贖死詔赦傳
庭以兵部左侍郎總督陝西提兵勦寇時朝廷
疑陝西總兵賀人龍與賊通密勅孫傳庭設計
斬之遂用人龍部將高傑陳勇高汝利等振旅
出關李自成方破開封長驅至鄭州一日拔之
遂蹙虎牢關入洛聞王師已出潼關悉起師逆

之過於汝州傳庭設三覆以待牛成虎將前軍
左勦將左鄭嘉棟將右高傑將中軍成虎佯北
以誘賊奔逐入伏中成虎還兵而闕高傑董
學禮突起翼之左勦鄭嘉棟左右橫擊斬首千
餘級賊潰東走追之賊盡棄甲杖軍資於地官
軍爭取之無復步伍賊覘官軍囂反兵乘之左
軍先潰諸軍繼之喪材官將校七十有八人賊
所喪資杖反倍獲之傳庭以兵敗上書自劾詔

傳庭圖功自贖李自成羅汝才合兵破汝寧連陷荊襄鄢郢席卷河南有衆百萬僭立名號兵勢日盛傳庭按兵不出有詔趣之限其作速勦寇癸未六月進傳庭兵部尚書總制應鳳江皖豫楚川黔勦寇軍務仍總制三邊鑄督師七省之印七月庚子傳庭發兵潼關分道進討以總兵牛成虎副將盧光祖為前鋒會河南總兵卜從善陳永福合兵洛陽之下池塞撤左良玉以

兵自九江赴汝寧夾擊八月丁丑牛成虎率諸將前驅遇賊於洛陽擊破之再敗之河岸追奔至汝州偽都督四天王李養純率所部來降知賊并兵守寶豐傳庭進軍寶豐合圍賊堅守不下自成以輕兵來援戰於城東白廣恩高傑盧光祖分兵逆戰却之癸卯復以精騎數千直攻官軍諸將復擊走之傳庭曰寶豐不即下而賊救大至則背腹受敵矣親督諸軍悉力拔之斬

偽州牧陳可新等數千級遂以大兵搗唐縣時
賊家口盡在唐縣賊發精騎來援官軍已入城
盡殺賊家口賊滿營痛哭壬寅傳庭自朱仙鎮
而南大雨六日糧車日行三十里又道淖未至
士馬俱飢或勸傳庭旋師就運道傳庭曰軍已
行即還亦飢奚濟乎要當破一縣就食耳甲辰
傳庭復却縣俱窮民集騾羊二百餘頃刻立
盡食不繼傳庭軍飢甚壬子兵譟於汝州降賊

李際遇陰通賊癸丑賊率精騎大至傳庭問計於諸將高傑請戰白廣恩曰我師困宜駐分據要害步為營以薄賊易耳傳庭恐賊遁曰將軍何怯獨不如高將軍耶廣恩不懌引所部八千人去賊前鋒名三堵牆一紅一白一黑各七千二百人來薄官軍接戰陷賊伏中賊乘之官軍大敗陷淖泥死者數千人高傑立嶺上望曰不可支矣麾衆退諸軍遂西走賊驅大隊疾追

一日馳走四百里至於孟津官軍死四萬餘人盡喪其軍資器仗傳庭與傑收散亡數千騎渡垣曲走河北初賊驅難民誘官兵斬獲皆良民也傳庭不知其詐奏賊中有逃歸者言賊聞臣名皆驚潰臣誓肅清楚豫不以一賊遺君父上信之曰呂對羣臣出傳庭䟽示衆兵部侍郎張鳳翔獨言賊素狡多詐示弱不可信且傳庭所統皆良將勁兵不如為陛下留此家當上

目懾之羣臣窺上意爭請命傳庭進勅未幾
果覆師乃削傳庭職充為事官扼守潼關衆尚
四萬十月賊一隻帟陷關鄉趨至潼關獲督師
大纛賊以纛紿守關者乘間突入潼關陷傳庭
奔華陰李自成問道緣崖出潼關後夾攻官軍
大潰賊既入關西行一隻帟復陷華陰傳庭及
白廣恩退屯渭南賊合衆數十萬陷渭南傳庭
沒於陣中失所在

楊文岳四川人萬曆己未進士官至河南總督
闖賊圍汝寧監軍孔貞會以川兵屯城東文岳
以保定兵屯城西賊兵進攻相拒一晝夜川兵
潰保定兵不支次早四面環攻戴板扉以障矢
石雲梯如牆而立鼓百道並登執文岳及分巡
僉事王世琮於城頭文岳世琮厲聲罵賊：怒
縛文岳世琮以大砲擊之洞胸糜骨以死世琮
初授河南推官屢却賊射矢貫耳不動號王鐵

耳賊屠士民數萬燔燒邸舍無遺同皆死難者
則有歸德府推官王世琰

宋一鶴

人為湖廣巡撫都御史一鶴貪懦

巧諂以楊嗣昌父名鶴投揭自署其名曰一鳥
流賊圍承天知府開門迎賊一鶴守下城巷戰
死之鍾祥知縣蕭漢有賢聲賊戒其部曰殺賢
令者死無赦乃幽之寺中戒諸僧曰令若死屠
余寺僧謹視之漢曰吾盡吾道不礙汝法遂自

經死之湖廣陷一嘗死難者則有襄陽兵備副
使張克儉黃州副使樊維城襄陽府推官鄺曰
廣隨州知州徐世淳城破賊入城世淳埋印署
後勒馬巷戰矢貫於頤刀屬於頰眼鼻橫斷墮
馬右手握印箱左手掣佩刀賊鉞刀交下陷胸
穴股以死

馮師孔河南原武人萬曆丙辰進士崇禎癸未
以副都御史巡撫陝西十月賊陷臨潼關中人

心所在瓦解師孔聞報急入西安保守賊至城
下師孔督兵出戰不利人勸之曰盍去諸師孔
曰地方官死地方禮也登陴抗守被執不屈死
之西安陷一皆司道死難者布政使趙建極萬
曆己未進士永寧人按察使黃綱天啟壬戌進
士光州人督糧道蘭副中崇禎辛未進士陵縣
人冀寧道毛文炳崇禎戊辰進士鄭州人冀北
道朱家仕崇禎戊辰進士臨洮人巡寧道畢拱

辰萬曆丙辰進士掖縣人寧武道王胤懋崇禎
辛未進士霸州人商雒道黃世清慶陽兵備道
段復興慶陽知府董琬甘肅兵備道林日瑞萬
曆丙辰進士銅山人總兵郭天吉同知藍臺太
原知府孫康周安丘人太原同知李之清廬陵
人中路同知吳銘通判朱如寶四川人蒲城宗
室知縣朱一統平定州人安邑舉人知縣房之
屏大興人中知縣華堞渭南進士知縣楊暄高

平人

徐標山東濟寧人天啟乙丑進士以僉都御史
巡撫保定流寇猖獗上召保定巡撫徐標入
對標奏曰臣自江淮來數千里見城陷處固蕩
然一空即有完城僅餘四壁蓬蒿滿路鷄犬無
聲曾未遇一耕者土地人民如今有幾皇上
亦何以致治乎上歔歔泣下標又上言屯田
及車戰諸策上善之遂令之任甲申正月賊

至真定知府丘茂華先遣家人出城標執茂華
下獄標麾下中軍伺標登城畫守禦劫標城外
殺之出茂華茂華檄屬縣叛以待賊標居常以
忠孝自礪彙古今忠孝廉節刻成一書進呈賜
留覽有勅獎諭

劉熙祚字仲緝常州武進人天啓四年舉人謁
選除興寧知縣興寧俗刁悍民有茹斷腸草恐
嚇人得所欲乃服解藥否者死而為所誣者家

立破熙祚嚴為之禁犯者死勿問而又令民得
輸草以代贖鍰冀絕其種或曰草可盡乎熙祚
曰不然但使吾在事而草不為毒繼吾者同心
行之勿懈此風可絕矣興學較詰姦盜境內又
安擢湖廣道監察御史巡按湖南至永州會部
院莊祖誨催餉四集賊乘之部院先行委熙祚
賊後賊望見偏裨蹕白馬前知為重臣突執熙
祚擁之去熙祚大罵不屈賊縛至宗師館備加

捷毒以繩曳足倒拖地上破腹剝臟而死有絕
命詩授小史陳緯置髻中佚出緯走柳遇部將
出詩鵲之弘光朝贈左都御史謚忠毅

金毓峒字鶴冲保定完縣人萬曆庚辰進士司

徒銓仲子舉萬曆乙卯科鄉試與從子肖孫讀

書卽山相對慨然輒有澄清之志已而中崇禎

甲戌進士官中書舍人辛巳秋以陳漕務稱旨

授湖廣道監察御史尋上寬征徭誅酷帥解黨

銅慎銓法諸䟽四上而四報可其辭黨銅一䟽
尤諍于羣小羅織清流之日而為海內所傳誦
出按秦川闕逆方窺函谷不敢入及峒復命賊
果踰關舉朝以不久任為恨甲申春召對便殿
旋草詔命監宣大軍宣雲告臨隨奉命督禁旅
往扼畿南要害峒冒矢石馳至保郡散家貲千
金犒士卒為固守計而是時峒之後子振孫以
劔術登武科相見泣下為誓死士卒皆流涕振

孫者肖孫弟也賊圍急振孫登陴挾矢殪渠帥
數人兄弟私誓曰一旦有變必從季父遊地下
峒聞之謂肖孫曰死易存孤難我以弱子為托
肖孫拜受命峒妻王氏盡出簪珥冠帔以犒士
士益奮賊相顧謂曰此固曩時按秦御史也欲
引去而三月十九日之信至峒痛哭誓與城俱
死懸銀牌以賞擊賊者得級無數二十四日辰
刻城南樓火起賊乘焰登城遂陷振孫躍馬赴

賊曰城頭殺爾帥者我也格鬪斃數人而死賊
支解之峒裂眦罵提劍斬一綠衣賊負印北叩
首曰臣力竭矣投三皇廟古井死王孺人縊死
侄孫婦嬰妻陳氏及侍兒桂春皆投井死賊大
索兩孤肖孫倫受炮烙慘刑體剝剝無完膚終
以得免三日後肖孫收峒骸骨如生人義峒之
死而益稱肖孫之不負所托

閔永傑字人孟山西蒲州人崇禎辛未進士初

任紹興府司李陞南京兵部武選司主事尋以
僉事為河南監軍賊自閩陝流毒楚豫積二十
年初掠亭聚既窺城堡士癸之交毋至一城不
即挺殺為限射城不如期者必屠勿赦百姓久
不見敵聞偽為仁義之聲爭先縛守令開門迎
時永傑呂睢陳道兵臨副使駐陳州陳州距睢
陽百八十里李賊陷睢陽呂令至陳、既寡守
其而故民不足守永傑本擬保境待援而士民

合詣永傑請必毋守開門迎降便永傑持義不
可衆曰即不能有競自破鎗矣永傑知不能守
單騎巡城歸曰百姓即愚無知願諸生豈無通
大義率先拜牛酒哉諸生搖手去及城陷永傑
入其署引縲為大呼者三自縊死贈太僕寺卿
賜祭塋

蔡道憲福建晉江人崇禎丁丑進士授湖廣長
沙府推官癸未八月流賊寇長沙長沙人民先

走李乾德奉吉王惠王走衡州總兵尹先民何
一德降賊巡撫王聚奎單騎走江夏賊至城下
呼蔡推官曰吾軍中皆知爾名可速降毋自苦
也道憲挽強弩射之獻賊怒攻三日夜而城陷
執道憲百計誘降不屈磔之健卒林國俊等九
人追侍道憲不去賊勸道憲降國俊曰如吾主
可降亦去矣不至今日賊曰爾主不降爾亦不
得活國俊曰若我輩願生亦去矣不至今日賊

併殺之內四卒奮然曰願少延旦夕葬主骸而後受刃賊義而許之於是四卒解衣裘主骸葬之南郭葬畢四卒自經百姓裹殘骸葬之為立廟于長沙題曰忠烈

徐學顏浙江永嘉人以恩貢選楚府長史危言正色王敬憚之豪宗有不率者理格勢禁之不
少阻攝江夏家以寇氛震隣築炮臺以資守禦
滿三載考王與撫按交薦之晉兵備副使癸未

六月流寇陷武昌學顏與賊鬪賊斷學顏左臂
學顏右手持刀鬪愈力大殺罵賊執支解之鬪
門殉難者二十餘人事聞贈按察使予祭一壇
有司治葬建祠於鄉錄一子入監讀書

李貞 人以進士為湖廣知縣癸未二
月闖賊攻知縣貞率士民堅守一晝夜殺傷賊
甚衆賊百道環攻一鼓而拔縱兵大殺李貞大
殺此賊曰驅百姓死守者知縣也妄殺何為見

自成唾罵不已自成怒褫其衣倒懸於樹貞大呼曰高皇帝有靈我必訴之上帝以殺賊斷其舌碎割之母喬氏及妻俱死

黎弘業廣東順德人天啟辛酉舉人年甫十九應省試直指監粵東閹事夢順德報冊第一人官至太僕覺異之是日放榜弘業首唱注視之不言其故而弘業出李司李應昇之門直指乃語所夢弘業應曰業通籍止此乎則屢瀕春官

崇禎甲戌授和州知州在官廉幹與鄉御史馬如蛟交厚時流寇自廬州三掠其鄙弘業具方畧上之道臣請固圉不省乃與如蛟鼓義壘城浚濠躬環甲冑登埤嚴晝夜如是數月不懈冬賊以十萬突城弘業同如蛟喋血誓衆分門死守賊以堅且釋去會大雪連日迷瞞耳目賊運蘆積城南高塚丈餘縱然守者驚而賊從北門懸城入如蛟死之弘業猶巷戰連敗賊遂縱掠

不甚求弘業弘業急返州堂題詩壁間引佩刀
自到手震不當喉噴血仆地有吏目甲隨數壯
士至扶起大呼等死不如觸賊刃死弘業負創
上馬吏目前挺冲亂刃不勝割吏目走獨返州
堂絕吭死之印猶在臂賊入見其絕命辭為官
不負民為臣不負君忠孝誠已盡生死安足論
賊諭衆曰此忠臣也勿犯其妻子署中聞弘業
死母李氏妻楊氏三女一妾皆自盡鳳陽巡撫

朱大典以開贈太僕寺卿廕一子入監讀書諭
祭塋祔名宦廟食

鍾鼎鉉廣東新會人崇禎甲戌進士將之任所
知以亂止之曰吾不赴任赴難也弘光乙酉五
月來守嘉興時清兵南下金陵不守直抵嘉興
百姓爭開門納降鼎鉉不能強閤六月鄉紳屠
象美起義鼎鉉仍署府事鼓舞協贊頗勞及象
美為亂兵所殺復與將軍陳梧登埤守禦七月

清兵來攻陸中軍領卒五百人水兵二百人至
斗門望而反走殿者被傷百餘人于是監軍推
官朱爾吉領鄉兵數千人戰清門之姚車敗績
死悟乃領三關兵出禦北門之外楊家村稍勝
奪清馬再戰復敗時各屬以兵至者為孝廉錢
璠為御史陸清源為翼卿朱太定為推官倪長
玕廿三日吏部尚書徐石麒縋城而入主其事
清兵益逼復出戰北門外麻雀墩大敗于是闔

門而守清以礮攻城聲震各屬援兵以義來咸
怯去梧亦偽托請兵走平湖廿七日城西被擊
裂清以桅作梯蟻上而東門開百姓走鼎鉉方
協守西門歸自縊鼓樓之下死時從死為門役
及皂隸二人白麒殉難諸生王鯤張翊常三益
都司孫光暘俱死之

吳從義號歲青山陰人以北藉試大興少好氣
節為諸生時疏叅魏忠賢以是知名貢入太學

崇禎庚辰年四十成進士授長安令秦地兵荒
存至千緡不得升粟從義下車請臺使設法賑
貸秦民賴以生者數十萬流賊李自成蹂躪豫
楚督師孫傳庭喪師睢陽潼關不守長安勢若
累卵從義躬練鄉兵嬰城固守時適繼娶胡夫
人送至署家人以合巹請從義曰此何時耶而
暇為此其遲之新夫人到署二十餘日不一顧
及城陷從義神色不改胥役促携檄出走從義

曰城亡與亡吾將安遑留一門子語曰汝素忠
謹吾當投井以報天子汝報吾家新夫人尚未
成禮可歸母家言畢投井死流賊入城知令死
叱兵丁毋犯其署且給廩餼家口得以全活事
聞贈山西按察司僉事廕一子入監讀書

王行儉南直宜興人崇禎丁丑進士授戶部主
事歷升四川重慶知府癸未獻賊至城陷脅降
之不屈罵不絕口支解之

張紹登江西南城人年十八登萬曆丁酉賢書
屢上春官不第就應城令甫朞年丙子冬獻賊
躡楚大攻應城紹登募鄉兵禦之踰三日有縉
紳子為內應開門縱賊入紹登守北門縛致縣
署令下跪不屈遂加極刑誅金貝紹登偽曰是
何難釋我入內衙即與汝賊縱之衆擁入至隙
處紹登佯指示猝以所佩印擊賊傷數人衆怒
拉出堂亂刀斫殺之賊曰我躡州縣夥矣未有

若此令者事聞贈尚寶卿廕一子入監讀書

楊暄山西高平人崇禎庚辰進士授陝西渭南知縣陞兵部主事未離任寇至城陷不屈死之
弘光中贈按察司僉事

蕭漢江西南豐人崇禎庚辰進士授鍾祥知縣
為人清介不入一贅絕請謁居官年餘猶負債
不得塞癸未鍾祥陷賊搥問其清名欲降之漢
不屈曰天生漢必不為賊引佩刀欲自裁賊奪

之不得死禁一寺環以衛卒令曰漢死斬卒且
誠漢曰從我食汝閱三日不得死偶得僧壞剪
衝喉死衣襟有血書曰一死報君邑人建祠祀
之

費曾謀江西鉛山人文憲宏孫也守遺訓潔身
礪行貧窶益堅由恩貢於崇禎辛巳授通許縣
知縣到任甫五日賊攻城悉心守禦身被數創
力竭城陷投井死之按臣蘓京疏請建祠

劉振之慈谿人以崇禎庚午舉人為河南鄆陵縣令城破振之衣冠北向再拜自經死有誓死詩曰遭際萬分艱成就一個是但拋七尺軀天下無難事

阮之鈿南直懷寧人以崇禎恩貢舉賢良方正科授湖廣穀城知縣時總督熊文燦議撫賊張獻忠等之鈿力諫賊狼子不可從文燦不聽奏之已而果反以之鈿初議懷恨殺之臨難有題

壁不負賢良方正等語家人無處覓屍觀題壁
處知其死所負以歸塋事聞贈太僕寺卿廕一
子入監讀書

王漢萊州掖人崇禎十年進士除高平縣令調
河內邑大饑漢貸萬金易粟于淮徐浮河而至
且捐俸減糶煮粥以賑在任加意修城垣募壯
士巨寇劉二將以正月三日攻濟源濟源告急
漢佯不應於除夜出賊不意赴之以元旦登天

壇山擒劉二乘大雪至山西破妖僧智善夜半
渡河破賊楊六即會李白成攻汴甚急外救弗
前漢乃率親兵至金龍口柳林諸處以大礮火
炬為疑兵遣死士入城中聲言宣大及左鎮兵
來援各數十萬至矣自成驚走當是時漢威名
震河北上聞皆奉旨優叙十五年三月以減
俸行取入都與蘇京王燮同召對于德政殿稱
旨命三臣皆以試御史監軍漢監左鎮督湖川

鄖兵與督臣侯恂援汴時兵部奏援勦兵十萬以十之四屬二臣以其六屬漢所監凡五萬九千然已潰散兵部以空名使之漢乃請自立標營兵千人騎二百報可乃簡保營兵百餘人募卽鄆鉅鹿壯士三百人又取故河南所鍊義兵及脩武濟源素從征勦者五百人及親故子弟合之共千人八月朔夜半襲賊于范家灘斬一紅甲賊目檄諸將合勦漢自走襄陽督左良

王兵救汴至潼關而巡方之命下會汴城陷沒
漢乃督諸將自柳園夜半渡河伏兵西岸檄卜
從善等夾擊之斬九十餘級遂入汴大張旗鼓
為疑兵追賊至朱仙鎮連戰皆克擢都察院右
僉都御史巡撫河南漢乃廣間諜收士豪議屯
田布置井、而劉超難作超永城人以武舉至
大將與其鄉御火魏景琦舉人喬明楷總練生
員王奇珍有宿讎一旦擅殺三家百餘口遂捷

永城漢䟽請討之奉密旨以策授漢遂提兵以
十六年正月十九日直抵永城環而攻之以二
十日四鼓奪其北門超在東門倚樓為寨自保
漢見兵大捷乃單騎入北門大呼勿殺百姓天
忽雨兵少却擁突門下漢為賊刃所及叅將陳
治邦游擊連光耀及家人劉璽張金皆戰死游
擊馬魁復力戰入城負漢屍以出面如生以漢
屍至夏邑棺殮河北士民皆哭失聲上聞嗟悼

贈兵部尚書廕一子錦衣衛百戶世襲後擒劉
超至京師磔之傳首九邊

趙士寬以官生為鳳陽府通判駐潁川行法不
撓崇禎七年正月賊犯潁寬遠往壽州一日夜
馳三百里歸潁城守甬入而圍合守具咄嗟立
辦已而州之大家先逃城內大擾賊乘以入寬
赴黑龍潭水死妻崔氏與二女同縊州役從死
者十數人贈光祿寺丞錢祚徵以舉人歷官至

汝州知州汝為賊出入孔道又有土賊聚至萬人依山為巢祚微至則簡鄉勇衛兵得千餘人佯為守城計忽夜半開川出從間道踰山谷步行抵其巢賊方縱酒不為備急擊大破之祚徵策賊衆難盡誅乃釋其俘招之仍令民千家立一寨有警相救賊屢失利其魁魯加勤等遂詣州降汝人休少十四年正月賊犯汝州祚徵中流矢力疾秉城督戰二月四日大風霾城上以礮擊

賊風逆火反樓堞盡焚賊乘之入祚徵被執大
罵不屈為賊擊刺無完膚死唐啟泰以舉人官
至宜陽知縣十四年賊陷宜陽啟泰不屈遇害
三人皆掖人皆官中州因並傳之

黃宗昌萊州即墨人天啟壬戌進士除雄縣知
縣下平即收豪族之奸橫者寘之法又有中涓
之黨乘中涓死盡攘其所竊宮帑回而殺人賄
結權貴無敢問者宗昌捕之論如律百方請囑不

聽調清苑崇禎改元奏最入為山西道御史首
劾權奄以殿工矯旨進銜者六十一人再劾周
延儒貪穢奉旨詰問奪俸巡按湖廣時岷王為
較尉彭侍聖及善化王長子企鉅等所弑其事
隱莫白詔法司及撫按鞠問三四年不得要領
乃命中官駙馬各一人前往會訊而撫臣以東
警入援宗昌獨決其獄復奉旨責問前諸臣失
出之罪宗昌疏糾一守道一知府一同知受賄

庇逆而上以宗昌不糾在先降四級調用其時
延儒已大拜矣宗昌既歸而復以清苑逋賦連
及候訊會詔蠲得釋十五年冬即墨被圍宗昌
率士民登陴固守仲子基中流矢死明年延儒
賜死掌憲李公邦華薦宗昌未及用而京師陷
宗昌將南赴以土賊圍城不得出家居二年握
髮以終

林日瑞銅山人萬曆丙辰進士授廬州推官陞

戶部主事歷官陝西左僉都御史巡撫甘肅甲申春聞國變以三千人勤王家丁張飛虎為將離任所三日遇李賊飛帟被殺日瑞退肅州兵散走文廟欲自裁而賊追及臂胸而死數日後西陵鎮哀其忠憤起攻賊殲其衆千人弘光中贈兵部尚書謚忠簡廕一子入監讀書

石匱書曰余自遭亂後見一死真匪易事乃以成敗論人猶訾其死為無益者則春秋責備之

過也向使李陵衛律能效死疆場自當黃金寫
像世祀之而後乃封王胡地髡髮毳裘迴視
彼截豁醢載裹屍馬革者其人品不大天壤哉